

Ko ima pravo na pohađanje obuke?

Obuke mogu pohađati članovi tijela u sistemu koordinacije procesa evropskih integracija i ostalih struktura uspostavljenih za potrebe procesa evropskih integracija, te državni službenici zaposleni u institucijama na svim nivoima vlasti u BiH koji direktno obavljaju poslove i radne zadatke vezane za evropske integracije i koordinaciju procesa pridruživanja BiH Evropskoj uniji.

Iznimno, obuke mogu pohađati naučni i stručni radnici, studenti dodiplomskih, poslijediplomskih i doktorskih studija u oblasti evropskih integracija, novinari, predstavnici nevladinih organizacija, zaposleni u javnim preduzećima i nezaposleni. Grupa polaznika obuke, u pravilu, broji između deset i 35 polaznika.

Prema kojim kriterijima se vrši odabir polaznika?

Osnovni kriterij za odabir polaznika za pohađanje obuka jeste relevantnost teme obuke u odnosu na opis posla. Državni službenici zaposleni u institucijama na svim nivoima vlasti u BiH koji direktno obavljaju poslove i radne zadatke vezane za evropske integracije i koordinaciju procesa pridruživanja BiH Evropskoj uniji odabiru se za pohađanje obuke primarno prema relevantnosti obuke u odnosu na opis posla, a potom i prema redoslijedu prijave, ukoliko je veći broj prijavljenih za koje je obuka utvrđena kao relevantna.

Naučni i stručni radnici, studenti dodiplomskih, poslijediplomskih i doktorskih studija u oblasti evropskih integracija, novinari, predstavnici nevladinih organizacija, zaposleni u javnim preduzećima i nezaposleni odabiru se za pohađanje obuke na koju su se prijavili ukoliko u prethodno formiranoj grupi polaznika postoji slobodno mjesto, te ukoliko je obuka relevantna za njihovo područje interesovanja, što se navodi u prijavi.

Da li je moguće da polaznik prisustvuje dva puta obuci s istom temom?

Odlukom o obukama u oblasti evropskih integracija ("Službeni glasnik BiH" br. 50/18 i 16/20), u članu 5. utvrđeni su nazivi obuka koje organizuje i provodi Direkcija za evropske integracije Vijeća ministara BiH.

Pojedini nazivi obuka u potpunosti su ili djelimično izmijenjeni u odnosu na obuke koje je Direkcija održavala do sada, što podrazumijeva i izmjene samih silabusa, odnosno sadržaja obuka.

Možete se ponovo prijaviti za obuku koju ste ranije pohađali, a Direkcija će, uvažavajući kriterije za izbor polaznika iz člana 8. Odluke, ocijeniti hoće li Vaša prijava biti prihvaćena. Prioritet će imati kandidati koji do sada nisu pohađali naše obuke, ali sve zavisi od broja prijavljenih kandidata i drugih kriterija propisanih Odlukom. Vaša prijava će, u svakom slučaju, biti razmotrena.

Da li su obuke besplatne ili je potrebna kotizacija?

Obuke koje provodi Direkcija za evropske integracije su besplatne.

Sve informacije o obukama, načinu prijave i terminima možete naći na web stranici Direkcije: www.dei.gov.ba.